


TEZAUUR LITURGIC
24 SEPTEMBRIE

SLUJBA
SF. DESPOT
VLADISLAV
AL SERBIEI



MINEIUL PE SEPTEMBRIE
MOSCOVA



МЕСЯЦА СЕПТЕМВРИЯ В 24-Й ДЕНЬ

Святаго благовернаго князя Владислава Сербскаго

НА ВЕЧЕРНИ

На Господи, возвах: стихирь, глас 6:

По имени твоему тако и житие твое: прозябый бо от славнаго корене, достойно подражал еси родителю первовенчанному, и венчан быв от Саввы великаго, отечеству явился еси слава и похвала, Владиславе приснопамятне.

По имени твоему тако и житие твое: взискал бо еси славы небесныя, и славою отечество твое обогативый, воздвигл еси в нем храмы и обители, взывая: не нам, Господи, не нам, но имени Твоему даждь славу о милости и истине Твоей.

По имени твоему тако и житие твое: неславныя бо мира сего возлюбил еси, убогия, нищия и увечныя. И тем обильно благотворивый, славне, достойно венчан был от Царя Небеснаго славою и честью нетленною.

Сла́ва, глас 8:

Христолюбивый Владисла́в самоде́ржец, я́ко дре́вле Дави́д пред киво́том, предходя́ пред святы́м те́лом Са́ввы, всея́ Сёрбии вели́каго и чу́днаго па́стыря, воспева́ше в весе́лии и ра́довании: вели́чит душа́ моя́ Го́спода, я́ко святы́ню сию́ вношу́ во оби́тель мою́.

И ны́не, Богоро́дичен, или́ Крестобогоро́дичен:

Пресвята́я Де́ва Влады́чица, предстоя́щи Кресту́ Сы́на Своего́ и Бо́га, умильно глаго́лаше слезя́щи: о Сы́не, ка́ко умира́еши сме́ртию безче́стною, че́стию венча́вый челове́ческое естество́? Утробо́ю уязвля́юся и ра́зумом трепещу́, Пречы́стая пла́кашеся го́рько.

На стихо́вне Окто́иха.

Та́же глаго́лем:

Стих: Го́споди, си́лою Твое́ю возвеселит́ся царь, и о спасе́нии Твоём возра́дуется зело́.

И поём стихи́ру, глас 4:

Веселит́ся и лику́ет страна́ Сёрбская, с не́ю же вси язы́цы словен́стии благоче́стно пра́зднуют. Предста́ бо царь Престо́лу Твоему́, Христе́ Бо́же, и мо́лит Тя о правосла́внем

во́инстве. Те́мже и мы взыва́ем ему́ в весе́лии:
ра́дуйся, Владисла́ве многоиме́ните.

Сла́ва, глас 2:

Егда́ страну́ твою́ сокрови́щами земны́ми
обога́тил еси́, тогда́ к Небе́сному Царю́ воззва́л
еси́: возлюбих́ слова́ Твоя́ па́че злата́ и
топа́зия. Те́мже благода́ть от Христа́ Бо́га
получи́вый и я́ко тала́нт сию́ умно́живый, не
преста́й Того́ о чту́щих тя моли́ти, да уще́дрит и
спасе́т ду́ши на́ша.

И ны́не, Богоро́дичен, или́ Крестобогоро́дичен:

Сокрыва́ше лучи́ своя́ со́лнце, и земля́ в
тре́пете содрога́шеся, и безду́шнии ка́мени
распада́хуся, вся́ же тварь́ окаменева́ше
у́жасом, и завеса́ церко́вная раздира́шеся,
А́нгели лица́ своя́ закры́ваху: но кий́ язы́к
испове́сть Твоя́ страда́ния у Креста́ Сы́на Твоего́,
Пречи́стая?

Тропа́рь, глас 4:

И́же ко́рене честна́го о́трасль сла́вная,
благове́рный кня́же Владисла́ве, в оте́честве
твоём до́бре ца́рствовал еси́, и Ца́рствие
Небе́сное получи́вый, владе́еши сла́вою и че́стию

вели́кою. Те́мже не забу́ди язы́ков словéнских и правосла́вным лю́дем на сопроти́вныя спобóрствуй.

НА УТРЕНИ

Кано́н, егóже краегране́сие:

Владисла́ва воспéти, Го́споди, сподо́би мя. Глас 2

Песнь 1

Ирмо́с: Гряди́те, лю́дие, поим песнь Христу́ Бо́гу, разде́льшему мо́ре, и наста́вльшему лю́ди, я́же изведе́ из рабо́ты египетския, я́ко просла́вился.

Владисла́ву царю́ песнь воспéти, Го́споди, сподо́би мя, оскверне́ннаго мно́гими и безме́стными согреше́ньми, па́дшаго во глубину́ зол и уязвленнаго тщесла́вием и го́рдостию лю́тою.

Лоза́ благоуха́нная виногра́да Христо́ва яви́лся еси́, Владисла́ве, процвёл бо еси́ на сла́внем древе́ царей́ благочестивых, егóже сла́достию пита́выйся, кра́сныя плоды́ произрасти́л еси́.

А́ще и мно́ги ско́рби от бра́та своего претерпе́л еси́, о́баче послуша́ния роди́телем отню́д не уклони́ся, те́мже и венча́ тя срóдник твой святы́й Са́вва богому́дрый ца́рским венце́м, достохва́льне.

Богоро́дичен: Де́во Пресвята́я, христиа́н похвало́, лица́ Твоего́ не отврати́ от нас, но я́ко милосе́рдая Ма́ти, защити́ ча́д Твои́х от враг ви́димых и неви́димых.

Песнь 3

Ирмо́с: На ка́мени мя ве́ры утверди́в, разшири́л еси́ уста́ моя́ на враги́ моя́. Возвесели́ бо ся дух мой, внего́да пе́ти: несть свят, я́коже Бог наш, и несть пра́веден па́че Тебе́, Го́споди.

Исти́нный насле́дник отцу́ своему́ первовенча́нному в забо́те о стране́ Се́рбстей был еси́, Владисла́ве, огражда́я ю́ от наше́ствия иноплеме́нных и от вся́кия междоусо́бныя бра́ни.

Суд Твой, Бо́же, царéви даждь, и пра́вду Твою́ сы́ну царéву, та́ко взыва́л еси́, блаже́нный царю́ Владисла́ве. Те́мже стяжа́л еси́ от Царя́ царéй ра́зум, во е́же твори́ти суд пра́ведный и ми́лостивый.

Лихвы и мзды отбежал еси яко огня,
Владиславе, присно ходяй пред лицем
Господним. Сего ради и благослови Бог тя и
страну Сербскую Своею богатою милостию.

Богородичен: Ангели удивишася, Чистая,
рождеству Твоему, мы же ужасаемся
всегдашнему Твоему предстательству о нас,
егоже не лишй нас, Владычице, за множество
наших прегрешений.

Седален, глас 4:

Воистину добрый воин Христов явился еси,
преславный царю Владиславе, оружием землю
свою защитивый и благочестием православную
веру оградивый, но яко имеяй дерзновение ко
Святей Троице, мир стране Сербстей испроси и
душам нашим велию милость.

Слава, и ныне, Богородичен:

Приятелище Божества неприступнаго
явилася еси, Пресвятая Дево Чистая, но простри
руце Твои ко Всемилостивому Спасу, да избавит
ны от всякия напасти и сподобит поклоняться
Ему неосужденно.

Крестобогородичен:

Предстоящи Кресту́ Сы́на Твоего́ и Бо́га, грехо́в моих ра́ди уязвлена и распя́таго, не прогне́вайся до конца́, Влады́чице, но Твои́ми всемо́щными моли́твами изба́ви мя от ве́чнаго осужде́ния.

Песнь 4

Ирмо́с: Прише́л еси́ от Де́вы, не ходата́й, ни А́нгел, но Сам, Го́споди, вопло́щься, и спасл еси́ всего́ мя челове́ка. Тем зову́ Ти: сла́ва си́ле Твое́й, Го́споди.

Ве́ру правую па́че зéницы о́ка храни́л еси́ во оте́честве своём, огражда́я ю́ от лати́нян и ага́рян, сего́ ра́ди сохрани́ тя Го́сподь от всякаго лю́таго обстоя́ния.

А́нгели сла́ву Бо́жию воспéша на Небеси́, егда́ ты, Владисла́ве, в земли́ Сёрбстей мно́гия хра́мы и оби́тели ино́ческия воздви́гл еси́, иде́же не умолка́ет моли́тва ко Го́споду.

Вои́стину всей вселéнней яви́лся еси́ удобре́ние, христолюбивый царю́ Владисла́ве, благотворя́ше бо и правосла́вным Це́рквам восто́ка, да́ры богаты́я сим посыла́я чрез Са́вву блаже́ннаго.

Богорóдичен: Одушевлённая палáто Царя царствующи́х и колесни́це свята́я Го́спода сла́вы, не оста́ви нас, в добродéтели убо́гих, помози́ нам грéшным, и вку́пе со святы́м царём Владисла́вом заступи́ нас и изба́ви от вéчнаго безчéстия.

Песнь 5

Ирмо́с: Свёта Подáтелю, и веко́в Тво́рче, Го́споди, во свéте Твои́х повелéний наста́ви нас: ра́зве бо Тебе́ ино́го Бо́га не знаём.

Си́лою Госпо́днею возвесели́лся еси́, царю́ Владисла́ве, и в ра́дости воспева́ше Ему́ пёснии хвале́бныя: ра́зве бо Тебе́ ино́го Бо́га не знаю.

Положи́ святы́й Савва на главé твоёй венéц от ка́мене чéстна. Живота́ вéчнаго проси́л еси́ у Влады́ки живота́, и Той ти даде́ долготу́ дней и спасéние во век ве́ка.

Е́же от враго́в нашéствие укроти́л еси́, Владисла́ве, побора́ше бо Госпо́дь на ня́ и гнёвом Свои́м смяте́ я. Я́ко упова́ше на Бо́га, те́мже крёпостию Его́ не подви́глся еси́, му́дре.

Богорóдичен: Тя, па́че ума́ и словесе́ Ма́терь Бо́жию, вёрнии сла́вим единому́дренно и

воспева́ем Ти пѣсни хвале́бныя, роди́ла бо еси́ нам вѣ́чное Ра́дование.

Песнь 6

Ирмо́с: В бѣ́дне грехо́вней валя́ся, неизсле́дную милосе́рдия Твоего́ призыва́ю бѣ́дну: от тли, Бо́же, мя возведи́.

Излия́ се́рдце моё́ сло́во бла́го: славословле́ния святокра́сному Владисла́ву, и́же ми́лостью и му́дростью стяжа́ небѣ́сное ра́дование, те́мже глаго́лю аз похва́лы царѣ́ви.

Глас Христо́в во Ева́нгелии услы́шавый, о некра́домем сокрови́щи попече́ся, и расточи́в и́мения своя́ ни́щим и убо́гим, стяжа́л еси́ Небѣ́сное Ца́рствие.

От ю́ности возлюбил еси́ отве́рженныя ми́ра сего́ и сотвори́л я еси́ дру́ги себе́ от бога́тства мимотеку́щаго, сего́ ра́ди оскуде́вшу ти в животе́ вре́меннем, ти́и прия́ша ты в вѣ́чная селѣ́ния.

Богоро́дичен: Стена́ еси́ и огражде́ние нам, Пресвята́я Де́во Чи́стая, на рабы́ Твоя́ неключи́мыя умилосе́рдися, немощна́я уврачу́й и оскудева́ющая воспо́лни.

Конда́к, глас 6:

Ца́рю Небе́сному подража́я, Уте́шителю и
Подате́лю жи́зни, бога́тства твоя́ убо́гим
расточа́ше, и был еси́ прибе́жище вся́кому
стра́ждущему, утеше́ние и заступле́ние
оби́димому, кре́пость и огражде́ние стране́
твое́й, Владисла́ве богоблаже́нне.

И́кос

Вои́стину яви́л еси́, Владисла́ве, в себе́ само́м
ца́рский о́браз смире́нием, милосе́рдием и
кро́тостию, послуша́нием Ца́рю Небе́сному и
любо́вию к лю́дем твои́м. Те́мже нас сподо́би
взыва́ти тебе́ и уми́льно глаго́лати: ра́дуйся,
мно́ги ско́рби претерпе́вый, ра́дуйся, сла́бости
лю́дския отту́ду позна́вый, ра́дуйся, сла́дость
жите́йскую ни во что́же вмени́вый, ра́дуйся,
печа́ль люде́й на ра́дость претвори́вый, ра́дуйся
се́рбская похва́ло и удобре́ние, ра́дуйся, ца́рей
сла́во и ни́щих весе́лие, Владисла́ве
богоблаже́нне.

Песнь 7

Ирмо́с: Те́лу злато́му премудры́я де́ти не
послужи́ша, и в пла́мень са́ми поидо́ша, и бо́ги

их обругаша, среди пламене возопиша, и ороси я Ангел: услышася уже уст ваших молитва.

Помаза Давида Самуил пророк иногда, показуя на сем Божие благоволение, тако и Савва святой ты, Владиславе, помаза, прозирая о тебе Божественное промышление.

Отбеже всякая злоба от души твоея, яко в сердца твоём Христос воцарися и заповедьми Своими Божественными низложи всякое беззаконие и гордыню.

Духовный разум от Бога стяжал еси и, егда воссташа на ты люди неблагодарнии, кратко царствие твое брату уступил еси, спасая страну от междоусобных брани.

Богородичен: Изумевает всяк ум пети Тя, Богородице, недоумевает всяк язык исповедати Твоя чудеса, обаче вместо словес веру прими. Ты бо христиан еси Заступница, Тя величаем.

Песнь 8

Ирмос: В печь огненную ко отроком еврейским снишедшаго, и пламень в росу преложшаго Бога, пойте, дела, яко Господа, и превозносите во вся веки.

Сѣрбии явѣстася вы, двоѣнца честная, Савво богомудре и Владиславе доброхвальне, первый Сѣрбский архиерѣю и венчаный им преславный государю, но молита вкупе о страждущем отечестве вашем.

Птица обрѣте себѣ храмину, и горлица гнездо себѣ, такожде Владислав обитель святую созда, идеже положи мѣщи Саввы святителя, послѣжде и сам упокойся тамо.

Обитель Милѣшевская процветѣ яко крин сѣльный, имущи в себѣ мѣщи двою угоднику Божию: Саввы святителя и Владислава царя, ихже молитвами, Господи, помилуй нас.

Богородичен: Дѣво Владычице, Мати всех нас, не презри людей согрешивших, на чада Твоя умилосердися и покрый нас честным Твоим омофором.

Песнь 9

Ирмос: Безначальна Родителя Сын, Бог и Господь, воплощся от Дѣвы нам явися, омраченна просветити, собрати расточенна. Тем Всепетую Богородицу величаем.

Обрѣл еси вѣчную славу, блаженне, со святыми упокоеваяся, темже и чтущих тя поминай у Престола Господа Вседержителя.

Блажен разумевая на нища и убога, в день лют избавит его Господь, темже и ты, царю Владиславе, обрел еси мзду праведных.

Изукрашенный сонм царей благочестивых в стране Сербстей преславно просия: Симеон, Стефан, Лазарь и инии мнози. С нимиже, Владиславе досточудне, молися о нас.

Многогрешный и суемудренный аз, не возмогах принести ти пения достойнаго, Владиславе, обаче ведуще тя милостива и нищелюбна, не презри моего убожества, молюся.

Богородичен: Яко одушевленному Божию кивоту слава Ти подобает, Владычице, превознесенна бо паче Горних чинов, родивши Сына, Превечнаго Бога.

Светилен, глас 1:

Воистину явился еси нищим сокровище, странным прибежище, утешение плачущим, обидимым заступление, стране Сербстей слава и ограждение. Темже и нам, святе Владиславе,

бу́ди предста́тель до́брый и моли́твенник
всеуспе́рдный.

Сла́ва, и ны́не, Богоро́дичен:

О всепе́тая Ма́ти, ро́ждшая всех Влады́ку и
Го́спода, на рабы́ Твоя́ умилосе́рдися и купно со
святы́м Владисла́вом моли́ спасты́ся душа́м
нашим.

На стихо́вне Окто́иха.

Та́же глаго́лем:

Стих: Го́споди, спаси́ ца́ря и услы́ши ны,
во́ньже а́ще день призове́м Тя.

И пое́м стихи́ру, глас 4:

Досто́йный насле́дник яви́лся еси́ святы́м
сро́дником твои́м держа́вным: Симео́ну
мироточи́вому и Стефа́ну перво́венча́нному,
ца́рский о́браз утвержда́я свя́тостью жити́я.
Те́мже Ца́рствие Небе́сное насле́довал еси́,
Владисла́ве присноблаже́нне.

Сла́ва, глас 8:

Весели́тся днесь оби́тель Миле́шевская,
иму́щи в себе́ всеизя́щное сокрови́ще, честны́я
мо́щи ца́ря Владисла́ва, изря́днаго
моли́твенника и ми́лостиваго засту́пника, ему́же

вси уми́льно глаго́лем: о пресла́вный царю́
Владисла́ве, не оста́ви нас моли́твами твои́ми.

И ны́не, Богоро́дичен, или́ Крестобогоро́дичен:

Егда́ ко Кресту́ пригвозди́ша Го́спода сла́вы
неблагодарни́и и злонра́вни́и лю́дие, на смерть
осуди́вше Жизнода́вца, тогда́ ору́жие про́йде
Твою́ святу́ю ду́шу и греси́ на́ши пронзи́ша Твоё
се́рдце, но не отри́ни нас до конца́ погиба́ющих
и изба́ви ве́чнаго муче́ния.

[Утверждена Священным Синодом

Русской Православной Церкви

25-26.12.2013 (журнал №147).]

